

Prijedlog

Na osnovu člana 24. i 117. Statuta Općine Kakanj („Službene novine Općine Kakanj“, broj: 4/08), člana 38. tačka 3. Zakona o udruženjima i fondacijama („Službene novine Federacije BiH“ broj: 45/02) te na osnovu člana 50. Odluke o izvršavanju budžeta Općine Kakanj za 2022. godinu („Službene novine Općine Kakanj, broj: 1/22) Općinsko vijeće na svojoj ____ sjednici održanoj _____.____.2022. godine donosi

O D L U K U

o jedinstvenim kriterijima za raspodjelu sredstava za finansiranje rada boračkih udruženja obezbjeđenih u Budžetu Općine Kakanj

Član 1.

Ovom Odlukom utvrđuju se kriteriji za raspodjelu sredstava za rad boračkih Udruženja obezbjeđenih u Budžetu Općine Kakanj.

Član 2.

Pravo na dodjelu sredstava iz Budžeta imaju boračka Udruženja i Savez/i udruženja boračkih organizacija registrovani u skladu sa Zakonom o udruženjima i fondacijama („Službene novine Federacije BiH“, broj 45/02), a koji imaju sjedište na području Općine Kakanj.

Savez/i udruženja boračkih organizacija istupa i aplicira u ime svojih članica, dok članice Saveza ne mogu aplicirati samostalno.

Član 3.

- 1) Sredstva se dodjeljuju na osnovu Javnog poziva.
- 2) Javni poziv se objavljuje u sredstvima informisanja i na zvaničnoj web-stranici Općine Kakanj.
- 3) Javni poziv za raspodjelu sredstava raspisuje Općinski Načelnik i traje 15 (petnaest) dana od dana objavljivanja.
- 4) Prijedlog raspodjele sredstava za Općinska boračka udruženja iz Budžeta Općine sačinjava Komisija koju imenuje općinski načelnik, a usvaja Općinsko vijeće Kakanj.

Član 4.

Pravo prijave na Javni poziv imaju boračka Udruženja i Savez/i udruženja boračkih organizacija koji su registrovani sa sjedištem na području Općine Kakanj, a koji ispunjavaju opće i posebne kriterije:

I – Opći kriteriji za raspodjelu sredstava

- Registriranost kod Ministarstva za pravosuđe i upravu Ze-do kantona;
- Posjedovanje Statuta Udruženja/Saveza
- Posljednji usvojeni izvještaj o radu Udruženja od strane Skupštine Udruženja-ne stariji od godinu dana;
- Posljednji usvojeni finansijski izvještaj od strane Skupštine Udruženja za utrošena budžetska sredstva i za sredstva iz drugih izvora kojima se finansira Udruženje-ne stariji od godinu dana;
- Realizovani i započeti projekti iz prethodne godine;
- Program rada za narednu godinu sa obrazloženjem;
- Finansijski plan za narednu godinu;
- Osnovne aktivnosti Udruženja;
- Inovativnost u rješavanju potreba članstva;
- Da ni po kojem osnovu nemaju dugovanja prema Općini, Javnim ustanovama, Javnim preduzećima i drugima za koje je istekao rok za plaćanje

II – Posebni kriteriji za raspodjelu sredstava

- Organiziranost i broj članova Udruženja
- Opravdanost broja uposlenih u Udruženju u odnosu na broj članova
- Broj realizovanih projekata iz dodjeljenih sredstava za finansiranje redovnog rada Udruženja u protekloj godini
- Aktivnosti Udruženja na očuvanju sjećanja na 1992.-1995. i 1941. -1945. godinu;
- Namjensko korištenje sredstava u skladu sa ovom Odlukom;
- Saradnja i pomoć drugim Udruženjima.

Član 5.

Zahtjev za dodjelu sredstava po raspisanom Javnom pozivu podnosi se Komisiji na propisanom obrascu za aplikacije.

Član 6.

Korisnici dodjeljenih sredstava su obavezni dodijeljena sredstva koristiti namjenski na osnovu svog finansijskog plana i programa rada.

Član 7.

- 1) Komisiju za raspodjelu sredstava imenuje Općinski načelnik.
- 2) Sekretar navedene Komisije koji nema pravo glasa treba da bude iz nadležne Službe za boračka pitanja, te će obavljati administrativne poslove u vezi Javnog poziva, dok članovi navedene Komisije treba da budu predstavnici boračkih udruženja.
- 3) Komisija će, nakon uvida u priloženu dokumentaciju, utvrdit da li su zadovoljeni opći i posebni kriteriji iz člana 4. ove Odluke, te će nakon provedenog postupka dostaviti prijedlog raspodjele sredstava Općinskom načelniku koji akt u formi prijedloga upućuje Općinskom vijeću Kakanj.
- 4) Visina sredstava za svako pojedinačno boračko Udruženje utvrđuje se Programom Općinskog vijeća Kakanj o raspodjeli sredstava – Transfer udruženjima boračkih populacija.
- 5) Odobrena sredstva doznačavaju se na transakcijski račun boračkih Udruženja na način da se ukupni odobreni iznos raspoređuje na 12 mjesečnih rata a isplaćuju se u skladu sa dinamikom priliva sredstava u Budžet Općine i to putem nadležne Službe.

Član 8.

- 1) Općinska boračka Udruženja kojima su doznačena sredstva, u skladu sa odredbama ove Odluke, obavezna su dostavljati Izvještaj o namjenskom utrošku sredstava Službi za društvene djelatnosti, boračka pitanja, raseljena lica, izbjeglice i povratnike i to do 20-og u mjesecu za prethodni.
- 2) Općinska boračka Udruženja koja se, kod korištenja sredstava, ne budu pridržavala odredaba ove Odluke, neće imati pravo učešća za dodjelu sredstava za narednu godinu niti će moći ostvarivati odobrena sredstva za naredni mjesec ukoliko ne dostave mjesečni izvještaj kako je to određeno u stavu 1. ovog člana.

Član 9.

Ova Odluka stupa na snagu danom donošenja na sjednici Općinskog vijeća Kakanj, a naknadno će biti objavljena u „Službenim novinama Općine Kakanj“.

Broj:
Kakanj, _____ 2022. godine

PREDSJEDAVALAČI OPĆINSKOG VIJEĆA

Slaven Katičić

O b r a z l o ž e n j e

Pravni osnov za donošenje ove Odluke je sadržan u Statutu Općine Kakanj u kojem je utvrđena nadležnost Općinskog vijeća Kakanj da donosi odluke, druge propise i opća akta i skladu sa članom 38. tačka 3. Zakona o udruženjima i fondacijama („Službene novine federacije BiH“, broj 45/02).

Razlog donošenja Odluke o kriterijima kao i priprema Javnog poziva je sadržan u preporuci Ureda za reviziju koji je sugerisao da se sredstva za rad boračkih udruženja trebaju transparentno odobravati putem javnog poziva i da se omogući da sva boračka udruženja imaju pravo prijave i učešća u raspodjeli sredstava iz Budžeta općine Kakanj.

Obradivač

Služba za društvene djelatnosti, boračka pitanja,
raseljena lica, izbjeglice i povratnike

OPĆINSKI NAČELNIK

Mirnes Bajtarević